

Dragi prijatelji/ce,

Predstavljamo vam **septembarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **185** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u septembru 2018.	2
Planovi za oktobar 2018.	7
Aktivnosti članova mreže	8
Saopštenja/informacije/donatori/pozivi.....	19

Uživajte u čitanju!

AKTIVNOSTI ORC/HCA U SEPTEMBRU 2018.

Profesionalna orijentacija kroz pasoš kompetencija

ORC Tuzla je početkom jula pokrenuo projekat “Profesionalna orijentacija kroz pasoš kompetencija”, podržan od strane Ambasade SAD u BiH.

Projekat će se realizirati do kraja ove godine, i pružit će podršku za najmanje 100 mladih ljudi sa šireg područja Tuzle (Lukavac i Živinice) iz završnih razreda osnovnih škola i prvih razreda srednjih škola.

U toku septembra projekat je krenuo sa realizacijom aktivnosti sa mladima. Projektom je zamišljeno da se aktivnosti sprovode sa mladima osnovnih i srednjih škola na području Tuzle, Lukavca i Živinica, ali, obzirom da Pedagoški zavod nije odobrio ulazak i rad u školama, aktivnosti se sprovode u zajednici, u partnerstvu sa nevladinim sektorom ali i obrazovnim institucijama, koje prosljeđuju mlade na vanškolske aktivnosti.



Planirane aktivnosti teku po planu.

Dvije grupe mladih (njih 48) su već priveli kraju set radionica „životne vještine“, u toku su ostale dvije grupe.

Ono što slijedi poslije završenih radionica za sve 4 grupe, jeste individualni rad na pasošu kompetencija, za 20 učesnika projekta.

“Objavlivanje ovog teksta je finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država.”



Mladi za bolju budućnost

Završna manifestacija u okviru projekta "Mladi za bolju budućnost" održana je 21.09.2018. godine u Kući plamena mira Tuzla, na kojoj je bilo čak 48 učesnika. Učesnici su dolazili iz raznih gradova, kao što su Brčko, Vitez, Doboj, Gradačac, Srebrenik, Živinice, Teočak, Travnik i naravno Tuzla, te iz predstavnici raznih organizacija i institucija: MUP TK, SOS dječija sela, Američka ambasada U BiH, Forum Građana Tuzle.



Na početku manifestacije učesnicima su se pozdravnim govorima obratili: James Contreras, predstavnik Američke ambasade u BiH, Vehid Šehić, predsjednik Foruma Građana Tuzle i Miralem Tursinović, direktor ORC Tuzla.

Tema manifestacije je bilo predstavljanje rada Omladinskog resursnog centra Tuzla u sklopu pomenutog projekta, predstavljanje mladih i njihovih dostignuća.

Učesnici završne manifestacije su imali priliku također da pogledaju izvođenje Forum teatar predstave, te premijerno izvođenje dokumentarnog filma "Bolji mladi za budućnost BiH".

Projekat je podržan od strane Američke ambasade u BiH, a partnerske organizacije na projektu su bile: PRONI centar za omladinski razvoj Brčko, Udruga mladih ENTER Vitez i Šesto Čulo Doboj.

"Objavlivanje ovog teksta je finansirano grantom Ministarstva vanjskih poslova Sjedinjenih Američkih Država (Department of State). Mišljenja, nalazi i zaključci koji su ovdje navedeni pripadaju autorima i ne odražavaju nužno mišljenja, nalaze i zaključke Ministarstva vanjskih poslova Sjedinjenih Američkih Država."



CAT



Omladinski resursni centar Tuzla je, u okviru kampanje „Know your CAT“ - Online aktivizam za mlade u okviru prevencije nasilnog ekstremizma, u Živinicama realizovao trening o sprovođenju omladinskih kampanja na društvenim mrežama.

Trening je okupio 10 mladih iz Živinica, koji su u periodu od 28. - 30. Septembra kroz druženje i učenje dobili mogućnost da:

- Usvoje osnovna znanja o korištenju društvenih mreža kao sredstvu za promjene u zajednici
- Osmisle, kreiraju i sprovedu SVOJU društvenu kampanju na internetu
- Upozna još mladih ljudi, dovoljno hrabrih i spremnih za kreiranje promjena u svom virtuelnom okruženju
- Motiviraju, potaknu i ohrabri svoje vršnjake na društveno korisne promjene
- Se odlično zabave



U nastavku ovih aktivnosti planiramo tokom oktobra održati još dva treninga: U Zvorniku od 3. do 5. oktobra i u Vitezu, od 12. do 14. oktobra.

„Literatura kao utopija“



„Veče vaše priče“

28. septembra je u prostorijama Kuće Plamena Mira održana je završna aktivnost u sklopu kampanje za povrat pisane riječi među mlade u Tuzli: Literatura kao UTOPIJA?, pod nazivom „Veče vaše priče“. Završna aktivnost je sumirala sve aktivnosti koje su bile sprovedene u sklopu kampanje, kao što su:

Ulična akcija „Pjesma za tebe“ koja je realizovana 13.septembra na ulicama grada Tuzle. Cilj akcije je bio da prije svega popravi i uljepša dan našim sugrađanima poznatom poezijom domaćih i stranih autora, koju su dijelili naši volonteri OG ORC-a Tuzla. Uličnom akcijom su također mladi upoznati sa samim projektom, jer se na poleđini svake pjesme nalazilo više o projektu.

Radionica kreativne komunikacije, koju je vodio direktor ORC-a Tuzla Miralem Tursinović. Sa učesnicima radionice je kroz vježbe odrađena tema komunikacije (verbalne i neverbalne). Radionica je bazirana na kreativnoj komunikaciji i oslobađanju emocija kod mladih, koji se u današnje vrijeme moderne tehnologije sve više povlače u sebe.

Radionica „Uvod u književne vode“, koju je vodio naš priznati domaći pisac Isa Balkan. Učesnici radionice su imali priliku da se upoznaju sa dadaizmom i tehnikama pisanja kroz dadaizam, te naravno sa samim načinom rada Isa Balkana.



Na pomenutom događaju „Veče vaše priče“ publika je imala priliku da uz zvuke akustične gitare uživa u prizoru i poslušala mala književna dostignuća učesnika kampanje za povrat pisane riječi među mlade. Učesnici su se za njihovo književno veče imali priliku pripremiti na već pomenutim radionicama, na kojima su učili tehnike pisanja, te oslobađanja emocija.

Pored samih učesnika publici se predstavio još jedan naš poznati domaći pisac, Mario Vranješ sa, u njemu prepoznatljivom stilu, pjesmom „Krkan“.



Također, predstavljeni su i rezultati ankete „Vaše vrijeme u virtualnom svijetu“. Anketiranje mladih grada Tuzle vršeno je u tokom čitave kampanje i pokazalo je da većina mladih provodi više od 6 sati dnevno na internetu, te da postoje mladi koji se nažalost ne sjećaju kada su pročitali svoju poslednju knjigu. Poražavajuća činjenica je da mladi pored svih mogućnosti koje Internet pruža, najviše svog vremena provedu na društvenim mrežama, čak njih 60,27%. Podaci nisu poražavajući, ali su svakako zabrinjavajući. Anketu možete pogledati na našoj stranici: www.omladina-bih.net

Događaj je završio izvedbom numere The Cranberries-Zombie, koja nosi veoma snažnu antiratnu poruku, te nas opominje koliko je nekada važno “staviti” riječi na papir.

Projekat je realizovao Omladinski resursni centar Tuzla, pod pokroviteljstvom Fondacije Tuzlanske Zajednice.

Omladinska grupa ORC Tuzla

Omladinski sajam u Tuzli



U okviru ovog projekta, koji realizira Omladinska Grupa ORC Tuzla, nakon odrađene ankete po srednjim školama i fakultetima, saznali smo da samo 8 % mladih volontira ili je volontiralo.

Upravo zbog toga, naši članovi, **Merima Čokić** i **Mario Mrkić**, ispred omladinske grupe Omladinskog Resursnog centra, odlučili su organizovati Sajam Nevladinih Organizacija na kojim ćete imati priliku da se informišete o tuzlanskim omladinskim organizacijama i upoznati ljude koje čine naš grad boljim

mjestom. Link za prijavu možete naći na našoj Facebook stranici.

Sajam će se održati 19. Oktobra u Gradskom parku, a prva ulična akcija je planirana 9. oktobra.

Ukoliko želite biti dio ove priče možete se prijaviti kao volonter i pomoći nam u realizovanju. Prijave se zatvaraju 5. oktobra i svi ste dobrodošli da se prijavite.

Projekat je finansiran od strane Insitututa za razvoj mladih KULT.

Leaders' Journey Vlasenica

Od 15. do 22. septembra u Vlasenici je održan trening kurs "Leaders' Journey". Ovaj trening organizovan je od strane See YN-a. Učesnici su dolazili iz 19 različitih organizacija iz: Bosne i Hercegovine, Hrvatske, Srbije, Crne Gore, Albanije, Grčke, Makedonije, Bugarske, Italije, Turske i Litvanije. Cilj treninga bio je treniranje novih i već iskusnih lidera. Učili smo osnove o pravljenju projekta, te za follow up aktivnost dobili zadatak da napravimo svoj projekat i da ga pokušamo pokrenuti. Na ovom treningu je, ispred Omladinske Grupe ORC-a učestvovao **Aziz Altumbabić**.



Ulična akcija „Ovo ti je najjače oružje



Ulična akcija pod nazivom „Ovo ti je najjače oružje“ se odvijala 22.septembra. Ova akcija je održana u nekoliko gradova Bosne i Hercegovine (Trebinje, Sarajevo, Tuzla). Cilj ove ulične akcije je da se kod mladih ljudi podigne svijest o važnosti izlaska na izbore. Putem letaka mladi ljudi su imali priliku da se upoznaju o osnovnim ljudskim pravima i slobodama, kao i građanskim i političkim pravima. Poseban akcenat u toku ove ulične akcije je stavljen na korištenje svoga glasa na izborima kao najjače oružje. Partneri ove ulične akcije pored YIHR BiH su: Omladinski Resursni centar Tuzla, Revolt i CORIE- centar za održivi razvoj i ekologiju.

Narandžasti dan (Orange day)

Omladinska grupa Omladinskog resursnog centra u Tuzli je, u saradnji sa drugim lokalnim nevladinim organizacijama 25. 09. obilježila "Narandžasti dan". Za ovaj mjesec, aktivisti u borbi protiv nasilja su snimili video, kako bi podigli svijest javnosti o količini nasilja nad ženama i djevojčicama. Sam video je nastavak aktivnosti predviđenih za Narandžasti dan, koje su započele 25.08. 2018. godine, a koje realizuje Omladinski resursni centar. Izvedena je simulacija nasilja, kako bi se ispitala reakcije građana, koje nisu izostale.

Pored Omladinske grupe ORC-a Tuzla, u realizaciji su učestvovali i: Asocijacija srednjoškolaca u BiH - lokalni tim Tuzla, Omladinska banka, Omladinski pokret Revolt Tuzla, Crveni križ Tuzla. Koordinatorica aktivnosti ispred Omladinske grupe je Samira Aličić.



Ovaj dan se obilježava kao Dan borbe protiv nasilja nad ženama i djevojčicama, a važno je napomenuti da fizičko nasilje nije jedini oblik nasilja sa kojim se žene susreću. Prema podacima Agencije za ravnopravnost polova, 52.8% žena je pretrpilo neki oblik nasilja od svoje 15-te godine. U Bosni i Hercegovini 51.1% ukupnog stanovništva čine žene, a svaka peta žena je žrtva nasilja. Ovo je problem sa kojim se u koštac treba uhvatiti cjelokupno stanovništvo, iz razloga što je rodna nejednakost najčešći uzrok nasilja.

Generalni sekretar UN-a je proglasio svaki 25. u mjesecu Narandžastim danom (Orange day), kao dan podsjećanja na važnost prevencije nasilja.

Veoma je važno da mladi ljudi, ali i svi ostali budu svjesni problema kojima su okruženi, te ne ostanu nijemi i bore se protiv njih. Još jedan od ciljeva Narandžastog dana je da se pokaže žrtvama da se imaju kome obratiti za pomoć, upoznavanje sa SOS brojevima i Sigurnim kućama.

REDOVNE AKTIVNOSTI ORC I HCA TUZLA

Tokom septembra radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA OKTOBAR 2018.

- Nastavak implementacije projekta „CAT 18“. U okviru ovog projekta u naredom periodu naše aktivnosti su: organizovanje treninga u Zvorniku i Vitezu, i nastavak online treninga i mentorstva.
- Nastavak rada na projektnim aktivnostima projekta Profesionalna orijentacija kroz Pasoš kompetencija (održavanje radionica u Lukavcu i Živnicama za učenike završnih razreda osnovnih škola i prvih razreda srednjih škola, podržanog od strane Ambasade SAD u Sarajevu).
- Aktivnosti omladinske grupe ORC-a Tuzla

AKTIVNOSTI ČLANICA OMLADINSKE MREŽE BiH



Asocijacija srednjoškolaca u Bosni i Hercegovini

Ul. Mula Mustafe Bašeskije 7, 71000 Sarajevo
Tel/fax: +387 33 205 850
E-mail: asubih@yahoo.com
Web: www.asubih.ba

Mjesec septembar je obilježen finaliziranjem i izvještavanjem nekoliko projekata i priprema za XI Generalnu skupštinu.

Početkom mjeseca smo počeli sa pisanjem narativnih izvještaja iz Stoca, Trebinja i Posušja, u sklopu projekta "Omladinske zone" i prikupljanja potrebne dokumentacije koje je IOM zahtijevao. Mentori lokalnih timova su tokom septembra prikupljali kvartalne izvještaje svojih timova, kako bi pred kraj mjeseca kreirali i poslala kvartalni izvještaj SHL-u.

U ovom mjesecu je završen i projekat "Postanimo a(tra)ktivniji!", te smo 30.09. poslali narativni izvještaj. Kada je upitanju XI Generalna skupština, u toku ovog mjeseca smo poslali projektnu aplikaciju SHL-u, objavili i zatvorili poziv za dopunske članove UO i predsjednika, kontaktirali potencijalne sponzore, poslali pozivnice donatorima i prijateljima AsuBiH-a, kreirali agendu i krenuli sa kreiranjem radionica. Pored toga, dogovorili smo saradnju sa Burch univerzitetom i održali nekoliko sastanka u vezi pripreme zajedničkih evenata.

Tokom mjeseca oktobra, planirana je realizacija 6 IT evenata u 4 grada: Sarajevo, Istočno Sarajevo, Zenica i Tuzla.



Krajem mjeseca, započela je i prva razmjena u drugom ciklusu projekta "Prijatelji bez granica", gdje srednjoškolci iz Brčkog borave u Gornjem Vakufu – Uskoplju. U ovom mjesecu, radili smo i na Socijalnom danu 18.

U sklopu toga, počeli smo se potpisivanjem prvih ugovora u lokalnim zajednicama, kreirali event za 19.10., nastavili sa promocijom Socijalnog dana, te najavili skoro svim školama koje učestvuju u Socijalnom danu naš plan aktivnosti. Posljedni projekti iz

Fonda Socijalnog dana za 2018. godinu su u toku ovog mjeseca realizirani, te su prikupljeni narativni i finasijski izvještaji. Što se tiče strukture organizacije, u ovom mjesecu je Valerija Blagojević dala ostavku na poziciji predsjednice organizacije, te je osnovan novi tim Vlasenica. Članovi Upravnog odbora imali su jedan online i jedan offline sastanak kako bi kreirali dalje planove rada i uspješno zatvorili III kvartal.

U mjesecu oktobru planiramo realizati naš treći po redu Socijalni dan, ali i održati XI Generalnu skupštinu. Pored toga, nastavit će se razmjene u okviru projekta „Prijatelji bez granica“



H.O. MUSLIMANSKO DOBROTVORNO DRUŠTVO – MERHAMED DOBOJ

Ul. Kralja Aleksandra 17, 74000 Dobož
Tel./fax: +387 53 226 886
E-mail: merhamet.doboj@cutuk.net
FB: www.facebook.com/Merhamet-Doboj

Osim stalnih aktivnosti koje podrazumjevaju: Evidentiranje članarine, štampanje korisnicima molbi, žalbi, raznih dopisa, fotokopiranja, rada sa članovima, pružanja informacija, raspodjele humanitarne pomoći, izrada projekata i prisustvo seminarima, okruglim stolovima i drugim sesijama, Merhamet Dobož je tokom septembra radio na sljedećem:

05.09. Održan je sastanak koalicije "Tolerantno i pozitivno" iz Doboža, na temu "Jačanje kapaciteta i partnerstava u borbi protiv mržnje u zajednici". Sastanku su prisustvovala sve članice koalicije, na čelu sa OSCE-om, koga veoma savjesno predstavlja Siniša Petrović, koordinatorom prof.dr. Bešlić Zijadom, zatim stručno predavanje na temu "Aktivizam kroz cikluse javne politike" koje je veoma konstruktivno održala prof.Olivera Nedić. Sastanku su takođe prisustvovali predstavnici lokalne samouprave i priključile su se još 3 nevladine organizacije.



07.09. Održan je sastanak "Lokalne akcione grupe" u Opštini Dobož, na kome je prisustvovala predsjednica "Merhamet-a" Faketa Avdić, a sastanak je vodila Sanja Stojčinović koordinatorica projekta lokalne uprave i samouprave. Na sastanku je razmatrano kako rasporediti dio sredstava koja su usmjerena prema učesnicima u projektu LAGA i aktivnostima koje su predviđene lokalnim akcionim programom. Treba da se uradi specifikacija prijedloga za namjenjene aktivnosti.

25.09. Održan je sastanak "Lokalne akcione grupe", gdje je bila prisutna predstavnica "Merhamet-a", a ispred švajcarske ambasade je bio gosp. Matias - nezavisni konsultant. Članovi "LAGA" i predstavnici Lokalne uprave i samouprave su prezentovali šta je do sada urađeno u projektu koji se implementira (rad na prevenciji konzumiranja alkohola, pušenja, droge i drugo).



26.09. Održan je seminar "Dijalog za budućnost" koji ima cilj stvoriti prostor za dijalog koji će omogućiti proces izgradnje mira u cijeloj zemlji, kako bi se nastavilo sa promocijom suživota, izgradnjom povjerenja i uvažavanjem različitosti. Seminar su prezentovali OKC Banja Luka

26.09. Aktivisti "Merhamet-a" prisustvovali su otvaranju novih prostorija saveza Kulturnog centra različitosti i izložbe "Bogatstvo različitosti". Prvo je održan kulturni dio manifestacije, zatim je uslijedilo otvaranje novih prostorija Kulturnog centra različitosti, nakon čega smo imali priliku prisustvovati otvaranju izložbe "Bogatstvo različitosti". Bilo je zaista impresivno.





PRONI Centar za omladinski razvoj

Ul. Mehmedagića 24, 76100 Brčko distrikt BiH

Tel./Fax: +387 49 217 695

E-mail: pronibrcko@teol.net

www.pronibrcko.ba

Predstavljanje istraživanja



PRONI Centar je 24.09. u Banjoj Luci učestvovao na debati "Omladinske politike uoči izbora 2018: šta političke stranke nude mladima?"

Debatu je organizovala Westminster Foundation for Democracy, gdje su učestvovali predstavnici omladine iz stranaka u RS kao i organizacije civilnog društva.

Predstavili smo ukratko naše istraživanje "Zastupljenost žena, mladih i nacionalnih manjina u zakonodavnim tijelima BiH" koje ćemo objaviti u izornoj sedmici.

Međunarodni dan mira

21.09. smo bili u Kući Plamena Mira u Tuzli, na završnoj manifestaciji projekta "Mladi za bolju budućnost", gdje smo kao partneri na projektu koji sprovodi Omladinski resursni centar Tuzla - ORC Tuzla u posljednjih godinu dana učestvovali na raznim aktivnostima.

Pored predstavljenog dokumentarnog filma o projektu, mladi iz Brčkog, Doboja i Tuzla izveli su "forum teatar" o kojem su imali priliku učiti u Vitezu ranije ove godine.

Prisutni su bili i gosti iz United States Embassy to Bosnia and Herzegovina koji su podržali ovaj projekat uz podršku i Grada Tuzle. Mladi su budućnost!



Budi muško klub Brčko

U okviru redovnih aktivnosti Budi Muško Kluba Brčko, 20.09. održali smo radionicu pod nazivom "Jednake šanse za sve ili ne?". Radionici je prisustvovalo 20 učenika drugog razreda srednje Tehničke škole. Na zabavan i interaktivan način željeli smo čuti koliko mladi ljudi znaju o programima za mlade u svojim zajednicama, da li svi imaju jednake šanse za učešće, te koliko iste koriste. Promovisali smo rad i buduće aktivnosti BMK te podijelili brošure.



Osnivanje Vijeća / Savjeta mladih Brčko

Ponosni smo što i Brčko distrikt BiH ima Vijeće/Savjet mladih!

Drago nam je što je i PRONI Centar za omladinski razvoj dio ove pozitivne priče. Vijeće/Savjet mladih Brčko distrikta BiH je osnovano 19.08. godine.



Konferencija Erasmus+ Mladi



PRONI Centar kao Contact Point BiH Erasmus+ YOUTH je 18.09. prisustvovao je ACTO Konferenciji, koju je organizovalo Vijeće mladih Federacije BiH, gdje je prisustvovalo 40 mladih iz krovnih organizacija mladih Srbije, Brčkog, Republike Srpske, Makedonije, Turske, Italije, Crne Gore i Bugarske. Predstavili smo Erasmus+ prilike za mlade, a najavili smo i treninge pisanja projekata za Erasmus+ u 4 grada BiH do kraja godine.

PRONI Proslavio 20 godina rada

Ove godine, 07.09. PRONI Centar za omladinski razvoj je proslavio 20 godina rada. Svečanost je održana u Brčkom, gdje je prisustvovalo preko 100 ljudi. Jako smo ponosni na naš rad i zahvaljujemo se svim našim partnerima, zaposlenicima i volonterima na dosadašnjem uloženom trudu.





OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitač je u septembru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su pravili naočare, ribice, lepeze. Takođe su imali par tematskih radionica na temu šta rade javne službe (policija, vatrogasci, hitna pomoć), te „Super Mario dan“, kada su pravili dekorativne gljive, radili su takođe slovo P. Na muzičkim radionicama su učili i vježbali pjesmice „Gym time“ i „Od kuće do Svica“.

Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljkom je kreativno izražavanje na kojima su učesnici i ovaj mjesec pravili razne kreacije, koristeći različite materijale. Kao i jutarnja grupa i ovi učesnici su pravili edukativne i maštovite dekoracije na temu Sunčev sistem, brodice, maske, itd. Utorkom su učesnici vježbali engleski jezik i svakodnevnu komunikaciju, te razne igre koje poboljšavaju učenje engleskog u grupi i timski rad. Pored ovih aktivnosti, učesnici su tokom mjeseca na muzičkim radionicama radili sa boomwhakersim-a, te vježbali različite ritmove. Srijedom su održane pozorišne radionice na temu supermarket, te su pisali scenarij; četvrtkom su se družili uz sportske aktivnosti i teambuilding igre, gdje su igrali razne timske igre, a petkom su nastavili raditi na radionicama njemačkog jezika i u drugom dijelu igre sa vodenim sportovima. Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u septembru je bio Adin Midžić uz asistenciju lokalnih, Weltwaerts, Erasmus+ i „Love Volunteers“ međunarodnih volontera. Sve aktivnosti se održavaju u Omladinskom centru Brčko distrikta.

Radionica gitare

Učesnici radionice gitare u septembru su nastavili sa redovnim radom.

Radionica sambe

Učesnici ove radionice ponavljali su kompozicije iz prethodnih mjeseci.

Eko projekat

Omladinska organizacija Svitač je zajedno sa članovima ASUBiH Lokalnog tima Brčko u maju započela rad na zajedničkom Eco projektu. U toku mjeseca je realizovana aktivnost čišćenja okruženja manjeg dječijeg igrališta, te sadnja cvijeća i začinskih biljaka sa nazivom „Sigurna zona“, koja je otvorena za sve građane Brčko distrikta.

Zaštita životne sredine je veoma važna tema. Ovaj projekat će omogućiti mladima da razviju i realizuju svoje ideje o životnoj sredini i njenoj zaštiti, a takođe im treba pružiti priliku da se upoznaju sa drugima istih interesovanja, kako bi imali mogućnost aktivno raditi na realizaciji svojih ideja.

Ljetni kampovi 2018.

Omladinska organizacija Svitač je u avgustu organizovala „Ljetne kampove“ (kreativni, muzički i jezički kamp) za djecu i mlade sa područja Brčko distrikta. Sve aktivnosti su se održavale u Omladinskom centru Brčko distrikt od 10:00 do 12:00 časova. Kamp je trajao od 27. 08. do 31. 08. 2018 sa finalnom završnicom i eventom „Dječiji Dan“

01. 09. 2018. Program za Dječiji Dan je počeo u 12:00 časova, a pozvani su roditelji i prijatelji svih učesnika, gdje se prezentovalo šta su naučili na muzičkom, kreativnom i jezičkom kampu i izložili mozaik. Održan je kratki muzički program učesnika Omladinske organizacije Svitac, izložba crteža i radova, te razne takmičarske igre i Bingo (tombola). Učesnici su nakon Binga mogli da uz osvježenje, muziku i druženje uživaju u ljetnom danu.



Muzički kamp

Aktivnosti na radionicama počinjale su kratkim zagrijavanjem, da bi se zatim prešlo na igre ritma, metrike, dinamike i timskog rada. Učeci kako da sviraju različite ritmove na različitim površinama, učesnici su istraživali različite boje zvuka kojima su izloženi u svakodnevnom životu, a koje se ne smatraju nužno "muzikalnim". Kao udaraljke korištene su plastične i metalne korpe različitih veličina. Uz bubnjarske palice, građevinski alati kao što su: klijesta, lopatice i metar korišteni su kao palice, ali i kao izvori zvuka. Samba instrumenti (surdo, repenique, tamborim, caixas i agogos) i boomwhackersi, korišteni su kao izvori zvuka kojima učesnici nisu izloženi u svakodnevnom životu. To su instrumenti koji se ne koriste u formalnom muzičkom obrazovanju u osnovnim i srednjim školama.



Takođe, učesnici su uz pomoć DAW-a (digitalna audio radna stanica) zajednički sastavljali ritmički obrazac uz pomoć matematike, bacanja kockica i spontanijh ideja. Kasnije, dobiveni rezultati unešeni su u softver i, koristeći pripremljene uzorke zvuka, aranžirani kao osnovni ritam. Iz tog ritma, komponovan je uvod, prelaz i kraj. Na kraju, grupa je podijeljena u manje grupe sa različitim zadacima. Jedna grupa je radila na pisanju tekstova; druga grupa snimala je vokale, a treća grupa bila je zadužena za "repanje" napisanog teksta. Ishod je pjesma od 3 minuta i

30 sekundi koja je imala radni naslov "Škafoškafnjak" (Tongue twister na BHS jeziku), a koja je kasnije preimenovana u naziv "Ekologija". Tekst uključuje vrijeme razlaganja različitih materijala u prirodi.

U subotu 01. septembra, tokom programa Dječijeg dana, pjesma je korištena kao pozadinska muzika za "ekološki cat-walk" koji su pripremili učesnici i učesnice kreativnog kampa.

Kreativni kamp

Tema na kreativnom kampu je bila „Ekologija i umjetnost“. Učesnici su prvenstveno imali priliku da kroz druženje i igru nauče više o zaštiti životne sredine, kako očuvati prirodne resurse, reciklirati u korisne svrhe razne materijale, te spojiti umjetnost sa ekologijom i raznim prirodnim materijalima i materijalima za reciklažu. Materijali koji su se koristili su: plastične flaše i kanisteri, kartonske kutije, perje, kamenje, lišće, vodene boje, masne boje, karton, plastične vreće, bambusovi štapovi, makaze, ljepilo, olovke, papiri, glina/glinamol, plastelin, boje u spreju i razne druge vrste ukrasnih papira, hamer papira i dekoracija. U okviru kreativnog kampa takođe je urađen mozaik na



temu „Mir i tolerancija“, koji će biti izložen u prostorijama Omladinskog centra. Mozaik predstavlja goluba mira, okruženog prirodom, rijekom i nebom. Ova aktivnost još jednom pokazuje da je tema ekologija nepresušna i da se izvanredno može spojiti sa mirovnim radom, umjetnošću i kreativnosti. Materijali koji su se koristili su keramičke pločice raznih veličina, boja i vrsta, ljepilo, fug masa, drvena ploča, te razni alati potrebni za keramičarski rad. Koordinator mozaik projekta je bila Julie Norburn (Art4Space, London). Lokalna asistentica na projektu je bila Ivana Knežić.

Jezički kamp

Učesnici jezičnog kampa imali su priliku prisustvovati radionicama na engleskom i španjolskom jeziku. Bilo je to lijepa promjena od svakodnevnih radionica i bila je vrlo dinamična i motivisana učesnicima. Tijekom radionica naučili su i poboljšali svoj vokabular vezan uz slobodno vrijeme i lične informacije, svijet hrane, zabava može započeti (glazba, film) i projektni dan: kulturna raznolikost (u BiH). Također su naučili osnove španjolskog jezika i glavne znamenitosti i značajke zemalja u kojima se engleski koristi kao prvi jezik.



FutureShorts – veče kratkog filma



U petak 31. 08. u 20:00 časova u Omladinskom centru u Brčkom održan je petnaesti FutureShorts film festival. Filmsko veče omogućila je Omladinska organizacija Svitač uz podršku Firefly International-a. Projekcija filmova u Brčkom dio je globalnog FutureShorts film festivala. Program ovogodišnje ljetne sezone prikazan je u 100 gradova i 40 zemalja širom svijeta. U program je uvršteno šest kratkometražnih filmova iz Švedske, Ujedinjenog Kraljevstva, Hrvatske, Francuske i Španije. Pobjednik ljetne sezone FutureShorts-a u Brčkom je film „Flight“ (režija: Laura Wahda)

Međunarodni dan demokratije

Povodom Međunarodnog dana demokratije koji je Generalna skupština UN proglasila 2007. godine, kao **Dan borbe za ostvarenje demokratskih ideala**, a koji se **obilježava 15. septembra**, Omladinska organizacija Svitac je organizovala kreativne radionice na kojima su učestvovala dvije grupe učesnika. Cilj radionica je bio da se promoviraju važnost jednakosti i timskog rada.

Mlađi učesnici su imali interaktivnu igru sa lopticama i diskusiju prilagođenu njihovom uzrastu na temu demokratija. Takođe su bojili radni list sa slikom šumskih životinja, koje provode vrijeme zajedno. Grupa 8+ je imala interaktivnu situaciju glasanja lopticama, zatim su pogledali isječak crtanog filma "Životinjska farma" od Džordž Orvela iz 1954, te su razgovarali na temu demokratija i dali svoje mišljenje o crtanom filmu. Na kraju radionice su radili na plakatu, kojeg su oslikali svojim rukama.



Međunarodni dan mira



u z r a s t u i t e m i r a d i o n i c e . N a k r a j u r a d i o n i c e s u r a d i l i n a p l a k a t u , n a k o j e m s u p r e d s t a v i l i m i r k a o d r v o s a š a r e n i m b o j a m a i p o r u k a m a m i r a .

Povodom Međunarodnog dana mira koji je Generalna skupština UN proglasila 2007. godine, kao **Dan borbe za svjetski mir**, a koji se **obilježava 21. septembra**, Omladinska organizacija Svitac je organizovala kreativne radionice za dvije grupe učesnika. Cilj radionica je bio da se promoviraju važnost mira u našoj okolini ali i u svijetu.

Mlađi učesnici su imali lutkarsku predstavu i diskusiju prilagođenu njihovom uzrastu na temu "Mir". Takođe su bojili radni list sa znakovima mira, "Bijela golubica" i "Peace sign – znak mira". Grupa 8+ je imala diskusiju šta je to mir i da li u svjetu zapravo vlada mir; zatim su pogledali Youtube klipove prilagođene njihovom

Za oktobar se planira nastavak svih redovnih radionica Omladinske organizacije Svitac.



Institut za razvoj mladih KULT



Ul. 4. Viteške brigade
34 – 36 BA, 71210 Ilidža,
Sarajevo
Tel: +387 33 778 778.
Fax: +387 33 778 79
E-mail: kult@mladi.org,
web: www.mladi.org

Mladi i razgovori sa kandidatima/kinjama za člana Predsjedništva BiH

Institut za razvoj mladih KULT u septembru je organizovao niz događaja "Kafa sa...kandidatima/kinjama za člana Predsjedništva BiH", kako bi podržao razumijevanje mladih u izbornom procesu za Predsjedništvo BiH, ali i kandidatima/kinjama omogućio da spoznaju stvarne izazove sa kojima se ova populacija susreće.



Gosti programa tokom septembra su bili Fahrudin Radončić, Jerko Ivanković Lijanović i Senad Šepić, kandidati za člana Predsjedništva BiH.

„Kafa sa...predsjedničkim kandidatom/kinjom“ namijenjena je mladima iz cijele BiH do 35 godina starosti, koji žele biti dio konstruktivnog dijaloga o potrebama i izazovima sa kojima se ova populacija suočava.

U Bosni i Hercegovini živi oko 700.000 mladih, koji su zakonima o mladima definisani kao osobe dobi od 15 do 30 godina. Većina mladih ima pravo glasa, a Institut za razvoj mladih KULT na ovaj način im želi dati priliku da budu birači, a ne glasači. Mladi trebaju i moraju biti dio programa političkih stranaka u BiH i krajnje je vrijeme da najviši nivo vlasti u svoj diskurs stavi mlade kao primarni fokus.

S druge strane, kroz program „Kafa sa...“ predstavnicima/a vlasti koje ti mladi biraju pružena je prilika da svoje izborne programe kreiraju u skladu sa stvarnim potrebama mladih u BiH.

Polaznici prve generacije UmiD-a za odrasle dobili certifikate

Prvoj generaciji polaznika/ca obuke Instituta za razvoj mladih KULT „Uči, misli i djeluj! za odrasle“ uručeni su certifikati.

16 polaznika/ca iz cijele Bosne i Hercegovine koji u formalnom obrazovanju direktno rade s djecom i mladima tokom obuke razvijali su kompetencije neophodne za rad u nastavi.

Pored svečanog djela dodjele certifikata koji je organizovan u Sarajevu, polaznici/e su imali priliku da budu dio programa "Kafa sa..." u okviru kojeg su razgovarali i iskustva preuzimali od predsjednika udruženja Kupujmo i koristimo domaće, Admiru Kape i kako učenici kažu, najboljeg profesora, Vedrana Zubića sa kojim su razgovarali o načinu kako se približiti učenicima i biti najveća podrška u njihovom razvoju.

Ovaj program obuke nastao je kao odgovor na potrebu za pružanjem podrške profesorima srednjih škola u razvoju kompetencija potrebnih za uspješno planiranje i realizaciju procesa učenja i podučavanja zasnovanog na principima iskustvenog učenja, korištenje učinkovite i relevantne metode i strategije podučavanja i stvaranje sigurnog i stimulativnog okruženja u kojem će se učenici/e osjećati podržano i motivirano i biti osposobljeni da uče cijeloga života.



Program obuke namijenjen je prvenstveno profesorima i profesoricama srednjih škola, ali i upravi škola, stručnim saradnicima/ama, te savjetnicima/ama u pedagoškim zavodima koji mogu podržati profesionalni razvoj nastavnog osoblja.

Program osigurava učenje kroz sve faze iskustvenog učenja: simulacije poučavanja i direktno iskustvo u radu s učenicima/ama, refleksiju na iskustvo, povezivanje s drugim situacijama i razumijevanje ključnih koncepata koji će im omogućiti da stečena znanja primjene u

različitim situacijama poučavanja, različitim predmetima i oblastima poučavanja. Uvažavajući potrebe profesora i drugog osoblja u srednjim školama, ovaj program smišljen je tako da se oslanja na prethodna znanja i iskustva polaznika/ca, istovremeno potičući profesionalni dijalog, razmjenu ideja, dobrih praksi ali i izazova s kojima se susreću u svom svakodnevnom radu.

Kako do zapošljavanja mladih?

O povećanju zapošljivosti i aktivnim mjerama za zapošljavanje mladih na Zapadnom Balkanu govorilo se i tokom drugog po redu sastanka Foruma o (samo)zapošljavanju mladih u Bosni i Hercegovini, koji je 19. septembra 2018. godine organizovan u Sarajevu.

Na sastanku su predstavljeni i regionalni izvještaji o povećanju zapošljivosti i aktivnim mjerama za zapošljavanje mladih na Zapadnom Balkanu koji su nastali na osnovu istraživanja koje je realizovano u BiH, Srbiji, Crnoj Gori, Albaniji, Kosovu i Makedoniji.

Predstavljeni su i istraživački dokumenti o pogodnom okruženju za preduzetništvo mladih u BiH i preduzetničkom učenju.

Mladi pokreću biznise iz nužnosti, a ne iz prilike. Svaka druga mlada osoba u FBiH bi pokrenula vlastiti biznis, ali joj nedostaju finansijska i stručna podrška. Strateški okvir za preduzetničko učenje predstavlja ključnu kompetenciju u obrazovnom sistemu, formalnom i neformalnom, neki su od zaključaka sastanka Foruma o (samo)zapošljavanju mladih u BiH.



S druge strane, manjak dobrih poslovnih ideja, manjak znanja, inovacija i vještina, slaba međugeneracijska podrška, vremenski ograničena podrška iz nevladinog sektora identifikovani su kao ključne prepreke za uspjeh mladih u pokretanju vlastitih biznisa. Pored toga, postojeći programi podrške uglavnom su namijenjeni za pokretanje biznisa, ali ne i u fazi razvoja.

Forum o (samo)zapošljavanju mladih u BiH je osnovan u okviru regionalnog projekta WeB4YES – Inicijativa organizacija civilnog društva Zapadnog Balkana za podršku zapošljavanju mladih koji se provodi u šest zemalja Zapadnog Balkana (BiH, Srbija, Crna Gora, Albanija, Kosovo i Makedonija).

Forum čine predstavnici organizacija civilnog društva, vlasti, akademske i poslovne zajednice, a cilj je uspostavljanje dijaloga između građanskog društva, vlasti i poslovne zajednice kako bi se izradile i zagovarale preporuke za politike koje bi unaprijedile zapošljavanje mladih i preduzetništvo.

Institut za razvoj mladih KULT sastanak je organizovao u okviru regionalnog projekta WeB4YES – Inicijativa organizacija civilnog društva Zapadnog Balkana za podršku zapošljavanju mladih. Projekat WEB4YES je podržan sredstvima Evropske komisije.

INFORMACIJE / DONATORI / POZIVI

LONAC & Omladinska banka u BiH: Budi sama svoja šefica! Budi sam svoj šef!

Pretvori ideje, hobije ili interese u vlastiti mikrobiznis. Osvoji od 500 do 2.000 KM ekspresnih bespovratnih sredstava! Fond za dodjelu iznosi 30.000 KM.

Preduslovi su jednostavni:

- Imaš između 18 i 35 godina;
- Sjedište tvog biznisa će biti na teritoriji BiH;
- Potrebno ti je od 500 KM do 2.000 KM
- Registrovat ćeš novi biznis unutar 3 mjeseca nakon što dobiješ novac.

Tvoj biznis će:

- Biti registrovan kao komercijalno poljoprivredno gazdinstvo, samostalno preduzetništvo (RS) ili obrt (FBiH);
- Uposliti minimalno jednu osobu (tebe ili nekog drugog);
- Pokazati potencijal za finansijsku održivost;
- Biti koristan i za širu društvenu zajednicu (više info u samoj prijavi).

VAŽNO: Glasanje i rokovi:

- Rok za prijavu je **10.10.2018. (do 14 h)**;
- Glasove skupljaš **od 7. do 13.11.2018. godine (do 14:00 h)**;
- Moraš prikupiti minimum 50 glasova;
- Bespovratni novac dobivaju oni sa najvećim brojem glasova unutar raspoloživog fonda.

Šta ne podržavamo:

- Biznis koji je već registrovan;
- Biznis čije djelovanje/proizvodi/usluge štete životnoj sredini;
- Biznis čije sjedište neće biti na teritoriji BiH;
- Biznis koji se bavi neistraženim i riskantnim industrijama (kriptovalute, alternativne metode liječenja, kockanje, i sl.).

Da znaš unaprijed:

- Nakon prijave biznisa (njen status treba da bude **U provjeri**), naš Odbor za mikropreduzetništvo će ti pomoći u razvoju prijave i finansijskog plana za prvu godinu poslovanja;
- Prije isplate, provjerićemo tvoj identitet, godište i potpisati Ugovor.

Više informacija: <https://www.lonac.pro/>

Otvoreni poziv za grantove: ARYSE

Otvoreni poziv za grantove je najavljen u sklopu projekta **ARYSE (At Risk Youth Social Social Empowerment)** – koji se sprovodi u okviru Civil Society Facility and Media Programme 2014-2015.

Projekat koordinira **NVO Juventas** (Crna Gora) sa sljedećim partnerskim organizacijama: **ARSIS** (Albanija), **Udruženje MARGINA** (Bosna i Hercegovina), **HOPS** (Makedonija), **LABYRINTH** (Kosovo), **PREVENT** (Srbija) i **SHL Foundation** (Nemačka).

Cilj ovog poziva je jačanje kapaciteta organizacija civilnog društva koji se odnose na zagovaranje dugoročno strateško organizaciono planiranje i finansiranje. Cilj je osiguranje održivosti, doprinoseći prepoznatljivosti uloge organizacija civilnog društva od javnih institucija te promovirajući stepen uključenosti OCD u odlučivanje pravljenje i reformske procese.

Relevantne tematske oblasti su: obrazovanje, zdravlje, zapošljavanje te socijalna inkluzija i socijalna zaštita.

Da bi projektni prijedlog bio uzet u razmatranje, moraju biti ispunjeni sljedeći kriteriji:

Aplikant može biti:

- Registrovana neprofitna/organizacija civilnog društva ili mreža, u skladu sa nacionalnim zakonodavstvom svoje zemlje (Albanija, Bosna i Hercegovina, Kosovo, Makedonija, Crna Gora ili Srbija), najmanje godinu dana pre objavljivanja ovog poziva;
- Registrovana neprofitna/organizacija civilnog društva ili mreža koja ima sjedište u svojoj matičnoj državi (Albanija, Bosna i Hercegovina, Kosovo, Makedonija, Crna Gora ili Srbija) i koja je u prethodnoj godini imala budžet od 10.000 eura do 100.000 eura;

Maksimalni iznos bilo kojeg grantu koji se traži po ovom pozivu je 10.000,00 EUR.

Rok za podnošenje projektnih prijedloga u štampanom i elektronskom obliku je **do 22. oktobra 2018.** (23: 59h).
Objekte aplikacije (elektronski i pismeno) moraju se podnijeti prije isteka navedenog roka.

Za detaljne informacije o tematskim oblastima, ciljevima, kriterijima i sredstvima pročitajte: [Guidelines](#)

Klix.ba traži fotoreportere: Zaposlite se na najposjećenijem portalu u BiH

Najposjećeniji informativni portal u BiH Klix.ba traži fotoreportere za područje Sarajeva. Bilo da imate ili nemate iskustva, prijavite se.

Posao fotoreportera na portalu Klix.ba podrazumijeva prvenstveno fotografisanje najvažnijih događaja na području Sarajeva i okoline. Od fotoreportera se traži da povremeno snima i video ili audioklipove s određenih događaja.

Od fotoreportera se očekuje da bude informisan o najvažnijim događajima u BiH, ima sklonost ka timskom radu, da je brz i voli učiti i napredovati.

Fotoreporter ne mora posjedovati vlastitu opremu ni auto, ali mora imati vozačku dozvolu.

Prijave sa CV-jem, pismom namjere i nekoliko fotografija slati isključivo na e-mail posao@klix.ba s naznakom za konkurs za fotoreportera.

Konkurs ostaje otvoren do 15. oktobra 2018. godine. Samo oni kandidati koji uđu u užu krug će biti pozvani na razgovor.

Javni poziv za dostavljanje projektnih prijedloga

Institut za razvoj mladih KULT objavio je javni poziv za nevladine organizacije registrirane u Bosni i Hercegovini (udruženja i fondacije osnovane prema zakonima o udruženjima i fondacijama u BiH) da dostave svoje projektne prijedloge u okviru **podrške aktivnostima nevladinih organizacija u BiH koje rade na pitanjima mladih.**

Na javni poziv se ne mogu prijaviti: javne ustanove, institucije vlasti, privredna društva, vjerske organizacije, politički subjekti, kao ni međunarodne nevladine organizacije koje nemaju registrirano svoje predstavništvo u Bosni i Hercegovini.

Sve projektne aktivnosti moraju se realizirati u Bosni i Hercegovini. Projektni prijedlog mora biti u skladu s oblastima ovog javnog poziva.

Svi potrebni obrasci, kao i cijeli tekst javnog poziva dostupni su na web-stranici <http://mladi.org/v2/bs/projekti/1/jacanje-vjestina-kod-mladih>.

Od aplikanta se traži da se **do 12. 10. 2018. do 16.00 sati** prijave, odn. da dostave nacrt projektnog prijedloga u elektronskom obliku, sa svim traženim prilogima putem linka <http://mladi.org/myURL/17010n211341>. Nacrti projektnih prijedloga koji ne budu dostavljeni na navedeni način neće biti uzeti u razmatranje.

Oblasti javnog poziva

Projektni prijedlozi moraju se isključivo odnositi na **unaprjeđenje politike prema mladima u BiH.**

Projektni prijedlozi odnose se na sljedeće oblasti koje se vežu za unaprjeđenje politike prema mladima u BiH:

- uspostavljanje zakonima predviđenih mehanizama politike prema mladima na svim nivoima vlasti kroz zagovaračke inicijative;
- provođenje zakona o mladima u FBiH/RS/BD;
- povećanje učešća mladih u procesima donošenja odluka.

Moguće teme projektnih prijedloga, a koje su vezane za gore navedene oblasti su sljedeće:

- Zapošljavanje mladih
- Obrazovanje mladih
- Učešće mladih
- Zdravstvena zaštita mladih
- Socijalna briga o mladima
- Informiranje i mobilnost mladih
- Sport, kultura i slobodno vrijeme mladih
- Ljudska prava i pitanja ravnopravnosti spolova iz perspektive mladih ljudi.

Više informacija: [Javni poziv](#) [Javni poziv za dostavljanje projektnih prijedloga za nevladine organizacije 17.01.0-N2.1-1341](#)



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
**Omladinski resursni centar
Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*Prevod Biltena na engleski: **Emir Karamujić***

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*